

Garantie oogelaffe!

Ich woor neulich bei mein Hausoorzt ins Wartezimmer gsetzt. Hobb mich ömmgeguggt unn bei die Unterhaltunge zughört. Unn bei mir gedocht: Doss sidd ächentlich goor nix merr aus wie a Oorztbraxis, sondern ehrer wie die Ersatzteilabteilung bei die BayWa! Der ee muss a neus Knie griech, der anner a künstliche Hüfte, a Fraa hodd vo neue Zähn verzählt, a annere vo ihr Schwiegermutter, die dement iss, a dretter sollt Stents unn Bypass griech. Wenn doss so weitergedd, docht ich, müsse mer alle ball zunn TÜV statt zunn Doggder!


Dehemm hobb ich s Philosophiern oogfange. Worömm iss doss alles so? Wie lang hat uns der Herrgott üüwerhaupt gebloond? Off wie vill Jahr hatt' er uns unn unner Konstruktion ausgeleechd? Rausgricht hobb ich, däss die Lebenserwartung bei Christi Geburt unn no üüwer ville Johrhunnerde hinweg im Durchschnitt nur zwösche 25 unn höchstens 45 Jahr woor. Im Durchschnitt! Doo licht nämlich s Missverständnis. Der niedrig Wert looch fast ausschließlich oo die extrem hoch Säuglings- unn Kinnersterblichkeit. Jedes zwedd Kind iss vuur sein föffde Gebuurdsooch gschturwe. Annererseits: Wer bei die Erwachsene s 15. Lebensjahr erreicht hatt', gab's gute Chancen, 50 oddr goot 60 Jahr alt zu werrn. Owwer natürlich kee 85, 90, 95 odder goor 100 wie heutzudooch.

Jetzt nehme merr amoll oo, däss unner Schöpfer – amoll ganz egal, wer s jetzt aa ömmer woor – uns off höchstens 70 Jahr ausgeleechd hatt'. Als allererstes hatt' er doo wohl aa die Rentenversicherung im Blick, weil die lommbige fönnef Jahr logger zu bezohle worrn. Heut griecher monche Rentner jo länger Rente wie se gschaftt hömm! Owwer doss iss jo nur a finanzielle Bedrohdung. Rein biologisch-orthopädisch mache ville vo die Gelenke unn Organe die Zeit, die mir länger leewe, als es unner Schöpfer gebloond hadd, eefoch nedd mit! Also: Tausende künstliche Knie, Hüfte, Zäh und und und für n Haufe Geld eigsetzt unn drüü gejommert, däss die Krankekasse so langsam owwer sicher naus die Nüss gehn.

Unn die Demenz? Vergleich unner Hirn mit n Kombjuder. Wenn der Speicher vool iss, iss Ende unn die Speicherkapazität muss erweitert weer. Odder alts Zeug - Ordner, Daten, Dateie - gelöscht weer, ömm Platz zu schaffe. Doss gedd bei'n Mensche (noch) nedd. Also vergesst er n Haufe Zeuch (meistens s Neues, s Ältere iss bei Demenzkranke oft und erstaunlich lang ömmer noch doo!), däss s üüwerhaupt einigermäßen weitergedd.

Däss ich die Kurve griech: Süsst hodds ömmer ghässe: „Staub bist du, und zu Staub kehrst du zurück.“ Heut guggt der Herrgott in die Urne, sidd Titan, Keramik unn Plastik unn murmelt bloß: „Könnt ihr vergess - alles Sondermüll!“

Servus, der Eustach.



(KI-erstellt)